



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tiryimyim@aolima



tir yimyim

TAPAK 8

Rahul Gandhi-i bendang li nung  
India tenung menüktsür

WPL: Delhi Capitals captain  
asütsü Meg Lanning shimogo



VOL. XX NO. 141 (ADOK 141)

DIMAPUR

KÜPTOKNÜ (SATURDAY)

METSÜREMI (MARCH) 04, 2023

₹ 5.00

## NDPP legislature party-i Neiphu Rio shimtet

Dimapur, March 3, 2023

(TYO): 14 buba Nagaland Legislative Assembly indang Nationalist Democratic Progressive Party Legislature Party (NDPPLP) mezüngbuba senden nung parnok lennir asütsü atema Neiphu Rio shim aser sorkar tasen akümtsü atema pa nem tashi agütsü.

NDPPLP-isa Nagaland nung vote enoktsürtem dang pelaba metetdaksü.

Nübertemi NDP aser chief minister Rio lenistüba nung tamang kaa pei pei constituency nungi 14 buba Nagaland Assembly atema nübo shimer yokba atema pelar, ta NDPPLP-i ashi.

Senden nung mendenji NDP secretary general Abu Metha liasü aser Chief Minister Rio o party president Chingwang Konyak nati NDPP züngsem 25 nem tenüngsang agütsü aser pelashishia agizük.

NDPP züngsem ajaki nübertem asoshi anibelem arema inyaksüla aser party manifesto nung nangzüka alibatem mapa küma inyaksü merangtsüla ta tenatisa ayongzüik.

NDPPLP-isa Nagaland state jenjang temabai ajungkettsü aser yimjung o terenlok atema inyaksü bangjemtep ta NDP media and communication committee-i sangdong ka nung metetdaksü.

Taküm election nung tang tetsür anati NDP ticket nung takok angu aser Nagaland nung tang mezüng atema tetsür MLA tem kümogo.

March 7, 2023 nü sorkar tasen tezüngzüktep agütsü akok ta NDP lennir TR Zeliang-i ashi.

Sorkar tasen tezüngzüktep magidang BJP high command-i CM Rio dena NDP lennir kar Delhi-i jaoka senden amentsü ta Zeliang-isa ashi.

## LJP(RV)-i Nagaland sorkar atema telemtetba magi

Dimapur, March 3, 2023

(TYO): Nagaland nung NDP aser BJP sorkar nung adentsüba central leaders ajanga lemtettsü ta Lok Janshakti Party (Ram Vilas)-i ashi.

Hotel Saramati nung osangbener den jembidang LJP national general secretary Dr Ajay Kumar Pandey-i iba osang lemsatep.

"Nagaland sorkar nung adentsüba party parliamentary board ajanga dang lemtettsü" ta pai ashi.

"LJP(RV)-i Nagaland atema dang masü saka taküm assembly elections agütsü aliba state 9 atema bilemer. Külen, 2024 küm parliamentary election atema onoki mapa inyaksüla" ta Dr. Pandey-isa ashi.

"Onok Nagaland sorkar nung shilem kecha meliaka election nung tokteptsü lemtet aser Nagaland nung alirtemi onok nem menden ana moatsüogo. Centre dangi Nagaland indang teblemstütem bener aotsü atema Nagaland nung alirtemi iba

maongka agütsüba atema pelar" ta paisa metetdaksü.

"Nagaland assembly election nung onoki BJP candidate tem den metoktep. Parnok den toktep asübo result balaka süla" ta Dr. Pandey-isa olen ka shisem.

"Onoki north east state ajak nung telok tera yanga aotsü tebilemba lir kechiyong north east ya India nung shilem ka lir. Onoki Nagaland nung North east cell ka lapoktsü aser iba jagi nübertem aser talisa lanurtem atema inyaksü" ta paisa metetdaksü.

LJP state Parliamentary board chairman, Kitoho S Rotokha-ia o jembidang "takok mesüra tamakok ya election nung shilem ka lir. Ni election nung tamakok angu saka nübor mulungjang aika kokogo" ta ashi.

Taküm election nung Rotokha-i Ghaspani-II nung LJP(RV) ticket amer toktep saka tamakok angu.

"Nübertemi shimtetba MLA temi nübertemi parnok dak imlaba ama alitsüla" ta Rotokha-isa ashi.

## Nagaland Legislative Assembly nung MLA tasen 29 lir

Dimapur, March 3, 2023

(Agencies): 14 buba Nagaland Legislative Assembly nung tang mezüng atema MLA inyaker parnok 29 lir.

Nagaland nung MLA tasentemji NDP nungi 11, NCP nungi 4, BJP nungi 3, NPP o RPI nungi anana (2) aser NPF, LJP (RV) o JD(U) nungi kaka lir. Ano parnok den Independent candidate 4 lir.

NDPP nungi MLA tasentemji Hekani Jakhalu, Salhoutuonuo Kruse, Z Nyusietho Nyuthe, Kekhriehoulie Yhome, Kudecho Khamo, TN Mannen, Ikuto, Temjenmenba, Imkongmar, Kiusumew Yimchunger aser W Chingang Konyak nung lir.

BJP nungi tasentemji A Pangjung Jamir, Bashangmongba Chang aser

Sethrongkyu nung lir.

NCP nungi MLA tasentemji Toiho Yeptho, Y Mhonbemo Humtsoe, A Pongshi Phom, aser Y Mankhao Konyak nung lir.

Külen, NPP nungi Dr Tseilhoutuo Rhütso aser Benei M Lamthiu na lir aser RPI(A) nungi Y Lima Onen Chang aser Imtichoba na lir.

Maneni, MLA tasentemji NPF nungi Achumbemo Kikon, LJP(RV) nungi Sukhato Sema aser JD(U) nungi Jwenga Seb nung lir.

Independent candidate temji Kevipodi Sophie, C Manpon Konyak, B Bangtick Phom, aser Neisatuo Mero nung lir.

Tejenpurtem: 14 buba NLA nung NDP MLA tejenpurtemji chief minister Neiphu Rio, Moatoshi

Longkumer, TR Zeliang, KG Kenye, Tongpang Ozukum, Sharingain Longkumer, Metsubo Jamir, KT Sukhalu, G Kaito Aye, Mhathung Yanthan, Noke Wangnao, Zhaleo Rio, S Keoshu Yimchunger aser CL John nung lir.

BJP nungi tejenpurtemji Tovihoto Ayemi, N Jacob Zhimomi, Imkong L Imchen, Temjen Imna Along, Kazheto, Yanthungo Patton, P Paiwang Konyak, K Konngam Konyak aser Kropol Vitsu nung lir.

NCP nungia Namri Nchang, Picto Shohe aser P Longon aser NPP nungi A Nyamnye Konyak, Nuklutoshi aser C Kipili Sangtam nung lir.

Maneni, NPF nungi Kuzholuzo Nienu aser LJP (RV) nungi Naiba Konyak na lir.

## Conrad Sangma-i Governor nem MLA 32 tenung agütsü

Shillong, March 3, 2023

(Agencies): National People's Party (NPP) president Conrad K Sangma-i Hokolbarnü Meghalaya Governor Phagu Chauhan den ajurutepa sorkar akümtsü asüngdangogo.

MLA 32-i pa pusemba indang shidi ka Conrad-i Governor Phagu Chauhan nem agütsü.

"BJP, HSPDP aser Independent MLA anati ni nungiter aser tarutsü anogotem ano nübo teimba akümtsü akok

kechiyong ni tanga party tem den jembidar" ta Conrad-i ashi.

Conrad-i Meghalaya governor den ajurutepdang BJP lennir ana-AL Hek aser Sanbor Shullai nati pa meina liasü.

March 7 anepdang 11:00 ako nung tezüngzüktep agütsü aser Prime Minister Narendra Modi-a adentsü shiogo, ta pai metetdaksü.

"Party balalai ni nungitba indang shidi ka ni Governor nem agütsüogo. Tang MLA 32 lir, NPP nungi 26 dak alia BJP aser

HSPDP nungi MLA anana aser Independent candidate 2 lir" ta Conrad-isa ashi.

"Parnok ajaki shidi nung sign süogo. Onoki party aser MLA kar den jembitepdar, anungji tarutsü anogotem nübo teimba akümtsü" ta paisa ashi.

Party aikati NPP-i aniba sorkar yaritsü shiogo ajisüaka sorkar teloktep tasen indang tenüng ano melemtet, ta Conrad-isa shisem.

(Maneni tapak 2 nung...)

## Saha-i Mar 8 nü Tripura CM tezüngzüktep agütsü akok

Agartala, March 3, 2023

(Agencies): Manik Saha-i Tripura nung kümsük tanabuba atema Chief Minister inyaksü akok aser March 8 nü Tripura sorkar tasen tezüngzüktep agiba sentong agütsü.

Hokolbarnü Manik Saha-i Governor Satyadeo Narain Arya den ajurutepa Chief Minister nungi anenba shidi agütsü.

"March 8 nü tezüngzüktep agiba sentong agütsü akok" ta Saha-i osangbener den jembidang ashi.

Tanü Governor Arya-i Dr Manik Saha dang sorkar tasen ka maküm tashi Chief Minister

inyaka atatsü ashi.

"Ni Tripura Governor den ajurutepa chief minister nungi anenba shidi agütsü aru aser pai ibaji agizükogo. Saka pai sorkar tasen ka maküm tashi Chief Minister inyaka atatsü kü nem lezmüksüogo" ta Saha-isa ashi.

BJP-i Chief Minister inyaksü atema tenüng kecha mashir saka election atema nüboyimba sentongtem ajanga Saha-i maneni Chief Minister inyaksü akok ta sayur.

Prime Minister Narendra Modi aser Home Minister Amit Shah na adenba election

sentongtem nung "Modi-Manik Saha sarkar" kümsük tanabuba indang jembia liasü.

Züngsem 60 agi akümba Tripura assembly nung BJP-IPFT ajanga menden 33 nung takok angu.

Külen, Tripura chuba jabaso Pradyot Debbarma'er TIPRA Motha party-i menden 13 nung takok nguteta liasü.

Ano, Left-Congress teloktepi menden 14 nung takok angu.

Tripura nung Trinamool Congress (TMC)-i menden 28 nung toktepa liasü saka parnoki menden ka nung danga takok mengutet.

## 14 buba NLA nung Opposition Party alitsü imlar

Dimapur, March 3, 2023

(Agencies): Naga yimten latettsü atema Nagaland nung opposition maliba sorkar ka kümteter aru ajisüaka nisung aikati sorkar nung opposition malibaji majung ta jembia aruogo.

Opposition party indang leader asütsü atema party kati assembly indang menden nungi 10% nungbo takok angutsüla. Ajisüaka 2018 election nung opposition indang vote lezmükbaji 1.1% dang liasü. 14 buba Nagaland Legislative

Assembly nung Nationalist Congress Party (NCP)-i menden 7 nung takok nguogo. NCP-i menden 6 adenba ajanga principal opposition party ta agizüksü aser cabinet minister jenjang nung leader of opposition ka shimtsü.

Taküm election nung NCP-isa votes 9.56% tashi ngutetogo aser parnoki BJP den tesentaktep malitsü ta shia lir.

Mapang kabo Bharatiya Janta Party aser Nationalist Congress Party yaritepa liasü saka tang

National level nung telok ana tesentaktep junga mali aser talisa ibaji Maharashtra indang state politics ajanga lir.

2019 assembly election sülen Maharashtra nung BJP-i NCP den külemi sorkar akümtsü merang ajisüaka taoba BJP CM Devendra Fadnavis-i sorkar akümtsü makok. Iba election nung BJP-Shiv Sena ajanga menden teimba nung takok angu saka meyiper NCP o Congress-i Shiv Sena den yaritepa sorkar aküm.

OFFICE OF THE  
NATIONALIST DEMOCRATIC PROGRESSIVE PARTY  
24TH ANGETYONGPANG A/C  
**PELABA LEMSATEPER**

Kü temeimba party workers, lenirtem, tembar aser adianutem, iba 14 buba Nagaland Legislative Assembly election nung nenoki tarezmük shisatsü tener bendanga agütsüba aser nendaka mapa meranga inyakba ajanga takok tulu ajangzükogo. Iba election campaign yagi len aisü nung kü tangatetba aser temulungsentsü nung ajungmesoba aser teblem dangtsü tasen aika ajangshio, koba ajanga ni ano tali ajemalushir Tsüngrem tenüngsanga nübor tenzüksü asoshi tashi itshir nokdaksü lemteter. Maneni kü wadang ajak nung nenok tenongitba nüngdaker ta kü temepishiba. Nenoki ni bendanga nongita yariba ya kü mulungjang nung teti lir. Kanga pelar.



(Tongpang Ozukum)

## Takok monguaka teimla mesamai lir: NPF Mkg Division

**Dimapur, Metsüremi/March 03 (TYO):** 14th Nagaland Legislative Assembly election nung 25, 28 aser 29 Assembly Constituency tem nungi NPF ticket amer toktepba atema ozü lenir tajung asem, Moasangba Jamir, Major Toshikaba aser Imjongwati dang kanga pelaba lemsateper aser konang tetushi agütsür, ta Naga People's Front (NPF) Mokochung Division ajanga sangdong ka nung ashi.

Ner opponent tem asoshi nenoka candidate tajung ka-ka

lir ta sayutetogo. Asenoki nübör molung mokoktetaka asenok teimla mesamar aser tarutsü nung tajungba nung inyaksü asoshi renemtsü, ta ashi.

Maneni nübörtemi NPF candidate tem dak tamang kaa parnok nem vote agütsüba atema pelaba lemsateper. Tan tetoktepba nung asenoki tamakok ajuruaka asenoki meima aliba NPF candidate nübör aser sempet mesamai lir, ta NPF Mokochung Division ajanga ashi.

Division ajanga ano lenir I. Imkong, Advisor to the NPF President (Political) dang pelaba shishimer, shibai election mapang Mokochung Division lenmang ajaklen nungi akok tashi yaria aruogo. Tsüngremi pa nem anema aliba takum ka aser arishi talang moajangma, ta ashi.

Tatamsa asen NPF lenir K. Azo Nienu aser Achumbemo dang election nung takok anguba tepela lemsateper, ta sangdong ajangasa ashi.

## DC Tseminyu ajanga detention centre lapokba metetdaksü

**Dimapur, Metsüremi/March 03 (TYO):** Deputy Commissioner & District Magistrate, Tseminyu, Dr. Zasekuolie Chusi IAS ajanga sangdong ka nung ashiba agi, Code of Criminal Procedure 1882 (10 of 1882) agi melaba ama district nung Section 144

CrPC, 1973 kübok district nung tesem kar nung curfew benokba ajanga tensa mejungi akumtsü teimla nung District Executive Force den senden ka amenba sülen district nung Temporary Jail/Detention center ka amenoktsü telemtetba agi.

ADC office tejenba nung

takdang ana mapang tatsüka atema Jail/Detention center ama amshitsü aser Tseminyu police station nung aloba Lock-up nung ama yangjia ayutsü, ta ashi.

Iba totuyuba ya tang nungi amshitsü aser tarutsü nung osang ka magütsü tashi alitsü, ta sangdong ajangasa ashi.

## Manipur sorkari excise duty ama sen crore 15.52 aazük: CM

**Imphal, Metsüremi/March 03 (Agencies):** Manipur sorkari excise duty ama 2021-22 nung sen crore 15.52 aazük. Iba osang ya 12th state assembly indang session asemubaba tatembang anogo Hokulbarnü opposition Congress MLA Kangujam Ranjit-i asüngdangba langzüa Manipur Chief Minister N Biren Singh-i agütsü.

State nung liquor legalization atema white paper ka sorkari renemtsü, ta Chief Minister Singh-i ashi.

Iba atema liquor legalization atema cabinet ajanga telemtetba agiba sülen expert committee ka tenteta lir, ta pai ashi.

Iba committee yagi March ita tatem tashinung parnok report

agütsütsü, ta paisa ashi.

Civilian temi security forces indang canteen tem nungi Indian Made Foreign Liquor (IMFL) aliba indang onük K Ranjit-i benokba nung iba ya ozüng anema lir, ta CM-i ashi.

State nung scheduled cast yimsüngtem nung Sekmai aser Andro densema yi tanen makai yangluba yagi temang nung timtem agütsütsü, ta Home aser Planning portfolio bena alisang CM Singh-i ashi.

Iba atema state nung yi yanglutsü asoshi ozüng agi melatsü atema state sorkari nübörtemi tangatetba lemsateptsü shia lir.

Coalition Against Drugs and Alcohol (CADA) densema lokti

tentet balala nungi kanga sashia anema nokdaka aliba mapang Manipur sorkari nübörtem, civil society organizations, NGOs aser kija dang state nung yi nokdanga aliba tera salatsü atema "white paper" renemtsü asoshi tatongba aser tangatetba lemsateptsü shia lir aser tenokdangba agüja aliba agienba ajanga küm shia revenue nung sen crore 600 angutsü, ta ashir.

1991 küm Manipur Liquor Prohibition Act, 1991 renemba sülen Manipur ua 'dry state' ta sangdonga lir.

Ajisüaka Scheduled Caste aser Scheduled Tribe kin temi akhi yimya amshitsü atema yi saa amshitsü melar.

## Conrad Sangma-i Governor nem... (Tapak 2 nungi...)



Meghalaya Chief Minister Conrad Sangma-i Shillong nung Meghalaya Governor Phagu Chauhan nem pa chief minister menden nungi anenba tezüluba nung agütsüba noksa nung angur.

NPP-i HSPDP MLA tem pur ao ta opposition-i ashiba atema "shingaia parnok pur mao, parnoki onok pusemer" ta Conrad-i metetdaksü.

Hokolbarnü Trinamool Congress, Congress, UDP, PDF aser VPP teloktemi 'non-NPP, non-BJP' sorkar akümstü atema jembitepa liasü.

Onoki ochimashiba lennirtem nungi Meghalaya kümzükünür, ta TMC lennir Mukul Sangma-i ashi. "Sorkar nung adentsü atema NPP nungi osang kecha maru" ta UDP president Metbah Lyngdoh-ia ashi.

Conrad-i aniba telok den

tem senden nung maden. Meghalaya assembly elections 2023 nung NPP-i menden 26 nguteta single-largest party aküm.

Taküm election nung BJP, HSPDP aser PDF teloktemi menden anana nung takok angu aser Independent candidate 2-ia takok angu.

Conrad K Sangma-i aniba sorkar nung yariteper UDP-i menden 11 nung takok ngua second-largest party aküm.

Külen, Congress aser Mamata Banerjee-i aniba TMC teloktemi menden pungugu nung takok angu.

Asa Voice of the People

menden 4 aser Hill State People's Democratic Party (HSPDP) o People's Democratic Front ajanga menden anana nung takok angu.

"Meghalaya nung NPP ajanga masü saka tanga party temi sorkar akümstü 100% takoktsü lenmang lir" ta TMC lennir aser taoba chief minister Mukul Sangma-i ashi.

"NPP aser BJP dak alaka tanga political party ajaki TMC den jembitepar" ta Mukul-i ashi.

Taküm assembly election nung NPP-i menden 26 aser BJP-i menden 2 nung dang takok ngutet. Meghalaya state sorkar

abirtepa atema menden 21 has

## TEPELA LEMSATEPER

1. Temeim Aonglensanger kü den nokdakertem, 14 buba Nagaland General Election nung asenoki tamakok nguogo. Tamakok nung tejashi tang masü takoksa tulu lir. Ajisaka iba tamakok nunga kü mulung achiba aser tepela tulu lir.
2. Candidate rongnung ni sensaktiba lir saka electioneering tepiyong künü tanga anüngaponga maliasü, kechiaser nenoki nübör, mapang, shisatsü, sarasadem, aria bilembatsüba den rongsen aser nungdakba ajak tenla agüja ozü den yaritep. Shirisa tenla tajung agütsüogo aser senti vote kü nem agütsüogo nenok ajak dang kanga pelaba lemsateper.
3. Sen tashi aser nisung tashi (muscle power) tzümetsüng tesashi-i nungshir ama nungshi nung aika laogo, ano Sorkar tashi ajak amshia (Govt. machinery) asen nübör, mapa aser temeten ajak ajetrepa nokdangogo. Ajisaka nenok kwikati tatem tashi kü den tsüngchia nokdaktetogo ibaji ni asoshi teperi ta züngshir.
4. Ni election makok saka Aonglensanger mulungjangbo ni timba kokogo ta shiteter, aser ibaji ni asoshi sentiba ta pelar.
5. Election nung tamakok nguaka akokba lenmang ajak nung nenok den yariteptsü asoshi ni nübör agütsütsü aser ozü ki teti lapoka lir.
6. Takok asoshi tenur Sharingain dang congratulation ashir aser nai Aonglenden, Mokochung aser Naga nübör ajak asoshi ne tajungtiba agi meranga inyaka anepalutsü imlar.

Toshipokba Longkumer  
INC Candidate, 26 Aonglenden Assembly Constituency.

## ICICI Bank

Registered Office: ICICI Bank Tower, Near Chakli Circle, Old Padra Road, Vadodara - 390007, Gujarat  
Corporate Office: ICICI Bank Towers, Bandra Kurla Complex, Bandra East, Mumbai - 400051, Maharashtra

### BRANCH TESEM MELENSHIBA OSANG

On Behalf of ICICI Bank Ltd., Dimapur Branch tenüng nung

Dear Customers,

Iba sangdong ajanga April 10, 2023 nungi tenzüka onok office tesem tajungba ka bushia melenshiba metetdaksü. Address teküboklen agüja lir:

New address: ICICI Bank Ltd., H No- 586, Dhobinala Road, Dimapur, Nagaland-797112.

Nenok nem agütsür aliba account numbers mesüra security items kecha memelenshitsü.

Mapang ajak nung nenok nem service tajungtiba agütsütsü nangzükür.

Sincerely,

Branch Manager, Dimapur Branch

## DC Longleng-i fireworks nokdang

**Dimapur, Metsüremi/March 03 (TYO):** Longleng Town nung tensa majungba aser curfew benoka aliba mechi candidate agent tem mesüra party worker temi election result sangdongba sülen lokti adenshia fireworks, crackers, jangzü apoba, gari nung rally sünzüba amala kecha Longleng Town nung memelar ta

Political Parties/Candidates & General Public ajak dang Deputy Commissioner & District Election Officer ajanga metetdaksüogo.

Iba totuyuba nung aibelener kar danga lira, Indian Penal Code 1860 indang section 188 kübok merenshitsü, ta sangdong ajangasa ashi.

## NPP Nagaland ajanga vote agütsürtem dang kanga pelar

**Dimapur, Metsüremi/March 03 (TYO):** 14th Nagaland Legislative Assembly election mapang bendanga agüja aser tasü ita NPP nem vote agütsüba atema pelaba lemsateper, ta National People's Party (NPP) Nagaland State sangdong ka ajanga ashi.

Party nung inyaker tuluba nungi tilaba tashi shirnokisa meranga inyakogo aser iba

election mapang nungitpepa aruogo, nenok ajak dang kanga pelar, ta sangdong ajanga ashi.

Maneni takok angur NPP MLA pongu den takok tepela lemsateper aser pei constituency tenüng nung ochi tangatetba nung nokdaksü ayongzükür.

NPP Nagaland teti nübör ajanga atema terenlok aser yimchijimjung asoshi inyaksü, ta sangdong ajangasa ashi.

## Indian Army recruitment atema recruitment lapoka lir

**Dimapur, Metsüremi/March 03 (TYO):** Indian Army nung Agniveer ama shimtsü asoshi Nagaland aser Manipur nung aliba district ajanga atema recruitment February 16 nungi March 15, 2023 tashi lapoka lir.

Candidate temi pei indang Aadhaar Card mesüra Class 10 certificate amshia register asütsü akok. Registration mapang candidate temi fee ama UPI, Credit/Debit Cards mesüra Internet Banking amshia sen 250 agütsütsüla. Candidate temi online transactions atema debit card tem activate asütsüla. Recruitment stage

mezüngbuba mapang tenüng agüja aliba candidates ajaki shimteta aliba exam centre nung online common entrance exam (CEE) agütsütsüla. Nagaland nung iba atema examination centre ana lir aser Manipur nung asem lir.

Candidate tem yaritsü asoshi Join Indian Army indang website nung 'How to Apply' aser 'How to Appear in Online CEE' tenüng nung tongtipang video ana inokja lir.

Army Recruiting Office, Rangapahar indang Helpline Number 03862-249012 aser 8974958673 alitsü.

### BJP MLA ka jabasoi sübokrem sen lakh 40 agiba mapang apu



Bengaluru, March 03, 2023: Bengaluru nung BJP MLA Madaal Virupakshappa'er jbasoi, Prashanth Kumar-i contractor ka dang nungi sübokrem agiba putetba sülen Lokayukta police-i MLA Maadal'er kidang sen aika apuba noksa nung angur.

**Bengaluru, March 03 (Agencies):** Karnataka state nung BJP MLA ka jbasoi sübokrem sen lakh 40 tagidak mapang nung apuba sülen Karnataka Special Lokayukta Court-i tai tonglokja alisangji anogo 14 atema judicial ket nung agütsüogo.

Lokayukta osang ajanga ashiba agi, BJP MLA Madal Virupakshappa'er jbasoi, Prashanth Madal judicaial ket nung agütsüogo aser mezüngbuba shilem bushisüngdangba sülen ketdangsertemi pa meshizüktüsü. Kasa ken o nung tai tonglokja alir nisung pezüa judicial ket nung agütsüogo.

Ketdangsertemi BJP MLA Madal Virupakshappa-a jaoka pa dang asüngdangyatsüa akok.

Lokayukta nungi atema osang tamajung, ketdangsertemi Prashant aser pa den yaritepa inyaker kitem mita aoba mapang sen crore 7.62 dak tema puogo.

BJP MLA Madal Virupakshappa'er jbasoi Prashanth ya Bengaluru Water Supply & Sewerage Board (BWSSB) nung Chief Accountant inyaker.

Iba ken o nung tai tonglokja apurtemji Prashanth den par kinünger Siddesh, accountant Surendra, Nicolas aser Gangadhar nung lir.

Brihostibarnü Nicolas aser Gangadhar na office-i arua Prashant nem sübokrem sen lakh 40 agütsüba mapang nung apu, ta Lokayukta osang ajanga metetdaksü.

Tang iba tatalokba ya BJP

atema osang tamajung, kechiyong Karnataka nung assembly elections agütsü mapang ana nung lia opposition-i, ketdangsertemi sorkar tenders atema commission 40% agir, ta tai tongloktsüba mapang nung iba ya ataloker.

Karnataka Soaps and Detergents Limited (KSDL) nem raw materials agütsü atema tender asoshi Prashanth-i sübokrem sen lakh 81 akhang aser pa indang office nung sübokrem lakh 40 pai meshizüktüba mapang nung jakdaka apu.

Prashath tebu, MLA Madal ya KSDL nung chairman.

Lokayukta-i Prevention of Corruption Act kübok ken o ka benokogo aser iba ken o bushisüngdangtsü atema CID nem agütsüogo.

### AAP lenir, Sisodia-i Delhi Court ka nem bail temepishiba agütsü

**New Delhi, March 03 (Agencies):** Tawa Delhi excise policy ochimashi ken o nung CBI-i Aam Aadmi Party lenir, Manish Sisodia apuba sülen pai Supreme Court nem bail temepishiba agütsü saka SC-i magizüktüba ajanga pai kasa temepishiba Delhi court ka nem agütsüogo.

Osang angazüktüba agi, March 3 nü pai Rouse Avenue Court nung bail temepishiba agütsü aser iba ken oji Honibarnü (March 4) angadangtsü.

Taoba mapang Delhi Deputy Chief Minister, Manish Sisodia February 26, 2023 nü apuba sülen pa tang tashi CBI ket nung lir .

February 28 nü pai Supreme Court nung bail temepishiba agütsü saka SC-i ibaji magizükti

High Court nung ang iba ken oji agütsütsü tuyua liasü.

Hombarnü special court kati Sisodia anogo pongunü atema CBI ket nung agütsü; iba mapang nungji CBI-i pa dang asüngdangyatsü.

Judge kati, tamalen-a kasa ken o nung pa dang anaben tashi asüngdangyago, ajisüaka pai melung asütsüsa telangzüba magütsü, ta metetdaksü.

Delhi excise policy ochimashi ken o dak sendakba nung CBI ketdangsertemi ashiba agi, AAP sorkari excise policy nung ochimashi mapa aika inyakogo, iba nungji Excise Policy yanglushiba, yi ayoktsü license atema sübokrem agiba, licence fee ajemtsüba mesüra atokba aser temelaba memeshii L-1 license atsülangtsüba densema lir.



March 03, 2023 nü Ranchi nung Jharkhand Finance Minister, Rameshwar Oraon-i state budget benoktsü atema Jharkhand Assembly tonga aodang tangokba noksa nung angur.

### Russia linüki nuclear war ajanga amokmerenba Quad-i aitsür

**New Delhi, Metsüremi/ March 03 (Agencies):** Temerenshi makai rara ayongzükba ya Russia dang memelatsüla, ta U.S. Secretary of State Antony Blinken den India, Japan aser Australia nungi Foreign Minister temi sangdong ka ajanga metetdaksü.

Hokolbarnü New Delhi nung Quad züngsem linüktem nungi Foreign Minister tem senden amenba sülen parnoki külem sangdong ka ajanga, Ukraine nung nuclear amshiba mesüra amshitsü amokmerenbaji magizüktetsü, ta metetdaksü.

Taoba ita Russia Tir, Vladimir Putin-i nuclear arms

control tezüngzüktep nungi atsüng aser nuclear tendangtsü amokmerena liasü.

India nung forum ka den jembidang Blinken-i, "Asenoki temerenshi kecha makai Russia nem Ukraine nung parnok sünütsü mesüdaktsütsüla, mesüra ibaji ajanga tesem ajaklen tamajungertem ajungmesotsü," ta ashi.

New Delhi nung G20 senden aliba mapang nung Blinken-i Quad telok nungi foreign minister tem den jurila senden amen.

Anogo ka jakdang New Delhi nung Blinken-i Russia Foreign Minister, Sergei Lavrov ajurua mapang tatsüka senden

amenba mapang nung Blinken-i Russia dang rara anentsü ajungshia liasü, ta US ketdangser kati metetdaksü.

Russian foreign ministry-ia, Lavrov aser Blinken nati minute 10-a mejembi aser iba mapang nungji kecha atsü-anema mejembi, ta metetdaksüogo.

G20 senden mapang nung US aser US pusemba linüktemi G20 züngsem linüktem dang Ukraine nung rara anentsü atema Russia rongshitsü ayongzüka liasü, ajisüaka Russia aser China linük nati anemba ajanga Ukraine rara dak sendakba nung G20-i külem sangdong kecha magütetet.

### Rahul Gandhi-i bendang li nung India tenüng menüktsür: Anurag Thakur

**New Delhi, Metsüremi/ March 03 (Agencies):** Hokolbarnü Union Mnister, Anurag Thakur-i, election nung Congress-i tamakok maneni anguba magizükteti Congress lenir, Rahul Gandhi-i bendang li nungi India tenüng menüktsür, ta aitsü.

Cambridge University nung jembidang Rahul Gandhi-i pegasus spyware amshia pa densema lenir aika itdangitogo, ta ashiba dak sendakba nung BJP lenir, Thakur-i, kechiba Rahul Gandhi den Congress lenirtemi Pegasus ken o bushisüngdangtsü atema Supreme Court-i tentetba technical committee nem parnok meyong phone magütsü?, ta asüngdang.

Cambridge University nung jembidang Rahul Gandhi-i, "India nung democracy amaker aser Israel nung spyware Pegasus ajanga ni densema yimtenren lenir aika itdangitogo," ta ashi.

Ato kilonser Narendra Modi aija Congress MP Rahul-i, "Ato kilonser Modi-i mapa tajung kechi inyak?. Tetsürtem nem gas cylinders agütsüba mesüra bank accounts lapoktsübjajibo junger ta ni-a shiteter," ta jembia liasü.

"Yangi Sikh nung ka mena

lir, pa India nungi lir. Ozü linük nung Muslim nung aser Khristantem lir, saka Ato kilonser Modi-i parnokji India nung 'second class' sensotem ta ashir. Ni iba nungji ai-aura makar," ta Gandhi-i metetdakja liasü.

New Delhi nung osangbenertem den jembidang Information & Broadcasting Minister, Thakur-i, "Ato kilonser yamai sempaba ya asenoki angateter, ajisüaka bendanger medemer teyari agia bendanger li nungi linük tenüng menüktsüba asalentong ya ajanga Congress tangatetba ashishitsüsa akümer," ta metetdaksü.

Thakur-i, assembly elections nung Congress-i tamakok angubaji Gandhi-i meteta lir, ibayongji pai bendanger li nungi tai tongloktsür, ta ashi.

"Ano maneni Congress-i elections nung tamakok nguogo, aser bendanger li nungi India tenüng menüktsütsü atema maongka agibaji ajanga parnok tejashi sayur," ta Thakur-i ashi.

"Pegasus dak sendakba nung, kechiba Rahul Gandhi aser tangar lenirtemi parnok meyong mobile phone magütsü? Nenoki kechi miimshiner? Bendanger teyari agia bendanger li nungi linük tenüng menüktsüba ya parnok yimya kümogo," ta pai ashi.



March 03, 2023 nü New Delhi nung Quad Foreign Minister tem senden tenzüksü lia (abelen nungi) Japan Foreign Affairs Minister Yoshimasa Hayashi, India External Affairs Minister, S. Jaishankar, US Secretary of State Antony Blinken aser Australia Foreign Minister Penny Wong nung külemi tangokba noksa nung angur.



## TIR YIMYIM YIMOBILEM (EDITORIAL)

DIMAPUR

KÜPTOKNÜ,

METSÜREMI 04, 2023

### Nagatsürtemi tebur menepogo

**N**agaland state yimten otsü nung 2023 küm election ya kanga dang tongtibang aser takok tulu anguba küm ka asütsü. Iba takokji yimten telok balalai anguba takok masü saka Nagaland kümer küm 60 buba nung mezüing Nagatsürtem Nagaland Legislative Assembly nung amentsüsa ka dang masü ana tashi tebur candidate-tem den election nung kanga sashia tokteper adokba otsü ya asütsü. Atangji, tetsür anaprongla ya Nationalist Democratic Progressive Party (NDPP) nungi lir saka tenati anguba takok yabo NDPP telok asoshi anguba takok dang masü saka Nagatsür ajak asoshi otsüsüsüsa anguba takok asütsü. Iba takok yagi Nagatsürtema yimten nung Naga nunger teburtem den kasasa toktepa shilem tajung agitsü asoshi kecha agia nokdanga mali ta kuli tajung ka agütsür. Atangji, Nagaland state general election nung tokteper tetsürtem rongnungbo tena tama masü, tena dang tama tetsür ishikatibo toktepogo saka takok mengutet. Ashiko, tang ya tenatika takok mengutetka asünungbo joko Nagatsürtemi teburtem den kasasa toktepa state general election-ibo meitetsü ta temulung ilaa kümer jembila aser teimla ajak agi "Reservation" aruba mapang shilem agitsü atema dang bilema lila. Ajisüaka, Dimapur Assembly Constituency-III nungi Hekani Jakhalu aser Western Angami Assembly Constituency nungi Salhoutuonuo Kruse nati takok anguba ajanga Nagatsürtem ajak temulung tuluba kümdaktsüogo aser Nagatsür ajak nem "Reservation" balaka maliyonga Nagatsürtemi teburtem den kasasa yimten khuret bentetsü aser nübortem nem lenisüba tajung agütsütetsü ta tangatetba tuluka agütsüogo. Atangji, Urban Local Bodies nung dang masü saka Assembly aser Parliament nunga dena tetsürtem nem 'Reservation' agütsüsüji nüngdak, anungji agütsüsüla. Ajisüaka, shitakba yimten nung shilem agia nübortem asoshi tajung inyaktsütsü asoshi "reservation" atatsü menügdaker. Odanga, reservation mapang aruyonga reservation nung adokertem dang nungibo tang amaji reserve süa malidak tebur den kasasa yimten aser nübortem asoshi pei tangatetba onüktem jembila tokteper adokertemjisa tajungba, tasütaitba aser temulung tuluba asütsü. Pei lima ochimashiba mapatem nungi kümzüksü asoshi yimten nung bendanga agüja tokteper watsütemjibo itemji dang asütsü. Watsü ya tetsür mashi (ordinary) ka dang ajaba tenüing ka masü, iba ya ozü (waza) ajak madak tetsü, anungji laji khuret tulu abenba tetsü ka lir. Laji kidang soruchioker, ki aoker aser sü ashir tetsür ka dangbo masü saka lokti aser yimten asoshi nüken belem aser nüngsen agia inyakba tetsür ka lir. La marakzüi tesepe nung dang tangari 'reservation' nung yua aliba bener arutsütsü atara, lar chirnurtem den la dena chiyongtsüa maka tesepe nungji yaseta asütsü. Aji oda, reservation nung aliba agitsü atar tetsütemibo pei kinungbo dena pur medemeri mezüingmeshitsüsa lapi kümdaktsütsü. Joko, Kruse aser Hekani nati sapokba lenmang nungji Nagatsürtema shisa tenük aser temulung lapoker lokti aser yimten khuret abentsü atema marendaki aotsüla. Atangji, yimten nung tetsürtem nem shilem magidaktsüyonga kecha masü ta asenoki aiben bilemer, ajisüaka yimten temzüing ozüing yangludak aser nübortem asoshi telemtetba agidak tetsür madenbaji lokti züingsem nung tesadang ka maden asütsü, iba jagi tanü temetetba aser tangatetba putu nungbo teburtemiang tetsürtem den yimten aser lokti khuret lemsateper. Aji oda, alima yimya agi tebur dang nungibo tetsür tesüingjamba, taremzükbba aser ochitashiba. Iba jagi asenok nem teimla tajung ka agütsür. Tajung kaji, joko asenoka tangar tashitemeteter lima den kasasa tebur o tetsür na tsüingda ali senmang aser yimten nung shilem agiba jenjang nuna tepila mali kümogo. Atangji, tanü tashi terenlok mapa inyakbatem nung asenok tangar state ajak dang nungi tamajungba aser teküpbokba jenjang nung lir. Ajisüaka, item tamakoktemji ajak nembangja tang Nagatsür anati MLA kümtetbaji terenlok mapa tajung tuluka inyaktet ama asenoki agidi. Atangji, Nagaland election aliba indang yabo tebang agi kodangang mejembi tetsübutsüka, tesasatsüka aser tesempatsüka lir. Ajisüaka, item timtem ajakji kokteta Nagatsürtemi takok ngua nokdaktet süra Nagatsürtem dak Nagaland topur junga yanglushitsü tashi aser temulungtetba tuluka lir ta angatetogo. Kodang 14 buba Nagaland Legislative Assembly kümteta senden lidir, senden nung Nagaland Legislative Assembly nung Nagatsür MLA-temi Naga yimten onük aser Nagaland ajungtsü asoshi ola adokba anogoji Nagaland nüchiso angutsü tenzükbba anogo ka asütsü.

## OLEMSABANG

### Ya Koda Asütsü

Toshi Ozüküm, Kohima Town

Tila tanur ishika dak alaka Naga nunger ajaki Nagalandji India state 29 rongnung State 16 buba lir ta meteta lir. State ngur joko küm 60 ajunger. Shidakba agi Nagaland nung Election 1 ben tang agitsüla. Saka taküm agi 14 ben buba agitsüsa akümer. Ya kechiba ta shisadang nung Legislaturstem menden tajungba raktepba agi parnok rongnung mi adok aser Assembly nung kiben tenzü. Iba jagi President Rule anaben aru aser election 14 ben agitsüsa akümer.

Political Party kari taküma President Rule yokang ta asaden. Aji saka ya chicken roll yoker ama masü. Assembly nung mepetmesü adoker shinga party kisungi yimsüsübaji bener moutetra Governor-i President dangi osang yoktsü. Iba sülen jiang RP aru. Ajisaka MLA 60 rongnung opposiion mali tipdema bener odar. Iba jagi PR ji maru.

2018 nung Election for solution ta yimyim ayimer election tenzü. Change is coming ta zülu tulu agi zülur Naga lima sünga prok. Election agi saka political solution maru. Linük tenzükertem temelizüing konga yutsür solution bushi nung kadasür settlement arutsü. Tamasa parnok kibong mesütsü aser taküm chiyongtsü angulen lemanng yateta yutsünungang solutionji arutsü ta nibo bilemer.

2018 election mapang Naga nungertemi candidates indang sen crore meyi ka dak tali chitsü. Candidate kabo Rs 30 crore indok ta osang kakat nung asenoki nguogo. Ibaji vote ka nung lakh kaka adok. Item sen kong nungi angu. Whatsapp nung adianu kati yamai ashiba asenoki nguogo. MLA MINISTER INDANG SEN MESHIA AGIBAJI PARNOKI ASENOK DEVELOPMENT SEN AUYADENA AYUBA NUNGI TERAKA AJEBTETER ASENOK NEM AGUTSÜR. AJI ASENOK PUBLIC SEN. IBAJI ELECTION MAPANG MESHIA AGIBAJI KECHA TAI MALIASU ANUNGJI AJI SHIDAK ALITSÜ SUDI. YA KODA ASÜTSÜ ?

Ano adianu kati election drama ta sür video ka kanga junga yanglur MUKH BAHADUR indang whatsapp nung yokbato asenok ajaki nguogo. Parnoki Nagamese nung act asü. Ibato Ao o nung yamai meyitsü akok. Minister tenüing Mukh Bahador. Pa kanga junga welcome asü. Announcer jagi yamai ashi "Tang asenok dangi Mukh Bahadur arutsü. Pa arudang body guard anati prangpong amer pa PS dena meyiner aru. Pai ashibato yamai "Nenoki küm pongu atema ni shimtet. Iba küm pongu tsüingda nung ni ki yanglutetogo aser alia aika aliogo. Meteta aser memeteti sorkar sen aika chiogo. Yamaji shir pai teyazü ajem jepa sayu. Pa body guard tena nüktzü aneta sayu. Iba sülen ken den messo aser ken nungji ano taruba küm pongu nunga ni sen tali tali bendentsü. Ku party worker nem car tasen alitsütsü. Lanurtem nem tajemtsü beria agutsütsü aser lanur tanishir nem Bike alitsütsü. Corruptionji arutsü lemanngjibo odang dokjang. Shibai kudang kechi ashitsü. Asapranger nem sen meyi pezü pongu agi tebang nembangtsütsü. Küm pongu atema parnokji ozü azü ama ni mesütsü. Iba sülen par azü bobby shidakba azü ajaba asenoki nguogo. Ibato kanga junga act süogo. Parnok nem tenüingsang agütsür Clean Election atema lanurtemi sangro tajung mejema azüingba aser ken ajang tayongzükbba tulu agutsüdar. Ibato kanga junger ta repringogo.

Feb 18, 7:30 PM nung All India Radio Kohima nung News angaba sülen Chief Electoral Officer den All India Radio nung inyaker kati sensaksem akaba angaa liasü. Tasüingdangba rongnung kaji tang tashi Nagalnd nung sen, yi aser miim mozü buba indang asüingdang. Idangji Hindu nunger tzümar tular jagi tang tashi nung Rs 40 crore tema ajepa aruogo aser item rongnung Rs 27 crore dak taliji miim mozü liasü ta ashidang ni joka tua aoksa. Tsüa Nagaland for Christ ta Naga nungertemi nema danga jembir saka ochi mashi mapa padakkadi inyaker no ya koda asütsü ta bilemer mejang. Anepdang saker Tir Yimyim aser Nagaland Post nung ajidangnung aji shidak zülua angu. Ya Naga nunger Christiantem atema maksü masü no? Anogo asem pezü tejaklen Bolero pezü nung yi aser miim mozü bener lia Police tasü taittemi apuba to koda. Iba amaisa inyak nungbo taruba küm pongu tsüingda nung Naga nunger lanur aika yiamata kümer yimdong sünga pakzüteptsü. Ya Naga nunger Christiantem atema maksü masü no? Candidatestemi yamai yi aser miim mozü chidaktsü nungbo 2028 elction atongdangbo lanurtem aika SÜADOKER VOTERS ISHIKATANG ANÜNGTSÜ, VOTERS MELIRA MLA MENDEN ISHIBA AKÜMTSÜ YA KODA ASÜTSÜ. Mizoram nungbo iba ama maksü osang asenoki mangashir. Arogo tenzüker karbo amangnung sen lema senzür aser Deobar Bodbar aser Honibar sentep nungbo numa dangaa amener . Ya koda asütsü ?

(Maneni asüing adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## New Delhi nung Hindu nungertemi Khristan book stall raksatsü



New Delhi, March 03, 2023: Pragati Maidan nung New Delhi World Book Fair nung The Gideons International-i lapokba Khristan book stall noksa nung angur. Book Fair ya February 25 nü tenzük aser March 5 nü temangtsü.

**March 03, 2023:** India linük yimtiba, New Delhi nung kanga nungtugu 'New Delhi World Book Fair' nung Hindu yimsü alia amangba telok kati Khristan book stall ka raksatsü.

Khristan book stall nungji Laishiba angati lema agütsüba ashishia parnoki book stall raksatsü.

Khristan melungtet telok The Gideons International-i 31buba 'New Delhi World Book Fair' nung Khristan stall lapoka lir saka March 1 nü Hindu yimsü alia amanger telok kati stall ji raksatsü.

March 2 nü osangbenertem den jembidang The Gideons International in India nung züngsem, David Philip-i, "Ajungbena nisung 40 shi saffron sü mesür aser tenütsü nung tilak teper arua 'Laishiba angati alemba anenang, yimsü meyipdaksüba anenang. Lord Ram tushiang' ta ayimdena liasü," ta metetdaksü.

"Parnok rongnung kati ni nongdokba agi ni alang. Parnok

kari Laishibatemi ali nungi shia aru aser kü den külem züngsemtem dang Laishiba angati alemba anenang, ta shia onok amokmeren," ta pai ashi.

"Tesüiba küm 10 tashi onoki New Delhi nung ayongzükba book nung shilem agia aruogo, saka onoki kodanga yamai timtem majurui liasü. Onok kanga aoksaogo aser onok melungjang nung tetsübu lir, saka iba sentong ya tesünep nung tembangtsü atema onoki sarasademer," ta pai metetdaksü.

New Delhi World Book Fair ya National Book Trust-i ayongzük aser Ministry of Commerce kübok India Trade Promotion Organization-i nungiter.

Book Fair ya February 25 nü New Delhi nung tenzük aser March 5 nü tembangtsü. Anogo 9 nü sentong nung linük 30 nungi publishers aser exhibitors 1,000 dak tema shilem agidar. Book Fair ya Minister of State for Education, Dr. Rajkumar

Ranjan Singh-i semzükja liasü.

Philip-isa, Book Fair nung tanga yimsü balala amangertemia yimsü dak sendakba kakat stalls lapoka lir, ajisüaka Hindu yimsü alia amangertemi The Gideons International anema dang inyakogo, ta metetdaksü.

Book stall raksatsüba sülen police arua onok dang ken o benokang ta tuyu, ajisüaka tongti office-i tuyuba ama onoki ken o mebenok, ta Philip-i ashi.

Book Fair nung Khristan kakat stall lapokertem rongnung ka- Pastor Ashok Mashih-i, Hindu nungertemi pa indang stall-ia arua pa dang Laishiba mayoktsü mesüra angati lema magütsüsüla, ta amokmerena liasü, ta metetdaksü.

Hindu nung kaket ayokba stall lapoker, Pandit Ram Prasad-ibo Khristantem pusema, "Iba tatalokba ya tia maka. Iba tatalokba ajanga alima nem osang tai agütsür. Administration-i aibelenertem anema inyaksüla," ta ashi.

## Sri Lanka nung Khristantemi Sri Lanka Tir anema ken o benoktsü

**Colombo, Metsüremi/ March 03, 2023 (Agencies):** 2019 küm Easter Sunday nü Sri Lanka nung Tenla ki ana amakba menokdangtetba atema iba lendong nung takoksa angur Khristantemi linük Tir, Ranil Wickremesinghe anema ken o benoktsü; pa Tir menden nungi aluba sülen pa anema ken o benoktsü.

March 1, 2023 nü Sri Lanka nung court kati, Wickremesinghe ya tang executive president lir, anungji pa anema benoka aliba ken o ajak agiena atatsüla, ta metetdaksü.

2019 küm kiralongrartemi bomb amshia amakdang Khristantem teimba ser nisung aika asüba sülen iba tatalokba dak sendakba nung ken o 108 benoka lir.

Ken o benoka alirtem rongnung ka- Anton Fernando-

i, "Tir aser ketdangsertemi takoksa angur kibongtem nem ochi temeden magütsüsü meranger. Taoba mapang Tir ka nembo temerenshi agütsüogo aser tang teinyakdak Tir-a pa kümsük tembangba sülen temerenshi agütsüsü," ta metetdaksü.

2019 küm Wickremesinghe ya Ato kilonser liasü aser Maithripala Sirisena Tir liasü. 2019 küm Easter Sunday nü kiralongrartemi bomb aika pokdaksüba lendong nung nisung 279 asü aser nisung 500 dak tema yirua liasü.

Fernando-i, "Onoki maneni ochi temeden bushitsü aser pa [Wickremesinghe] Tir menden nungi aluba sülen pa anema ken o benoktsü," ta metetdaksü.

Intelligence ajanga tekümdangtsü osang jelia metetdakja liasü, saka iba lendong menokdangtetba

atema Wickremesinghe aser Sirisena na densema yimtenren lenirtem aser ketdangsertem aika nem tai tongloktsü.

Taküm January ita nung Supreme Court-i Sirisena aser defense ministry nung tongti ketdangsertem dang iba lendong nung takoksa angurtem aser parnok kibongtem nem pei account nungi sen million 310 temenok agüjang, ta tuyua liasü.

Sirisena-i ita trok tsüngda takoksa angurtem nem sen million 100 agütsüsüla, ajisüaka pai ibajibo magütsüttsü ta shiogo.

Yaküm August ita nung Pope Francis-ia iba lendong nung takoksa angurtem nem pound sen 100,000 agütsüogo aser Sri Lanka nung ketdangsertem dang kiralongra nung shilem agirtem tenüng jungkai adoktsüsüla, ta takhangba agüja liasü.

## ANOGO ABEN TSÜNGREM DEN

## Tim Akhümtsübu (T.ken 76:1-2)

Asenoki Tsüngrem temeim indang angashir aser azünger saka ken ken Tsüngrem tsübuttsü amadoker. "Na, oda na tsübuttsü dang; aser na ken mit adokra ne tsüngdang shibai noktaktet?" (t.7). Asaphi kechi tetsübu indang ashir? Pai Tsüngrem uluba aser ain tsübuttsü indang jembi.

Asenok Tsüngrem Chirtem lir, aser asen mulungjang nung Tanela Temeshi "Abba, Oba," ta ayimtener. Asenoki "Kotak nung aliba obala" ta sarasademtsü akok. Asenoki Pa anasa aotsü akok aser Pai asenok anasa arutsü akok. Saka bilemtetang, Tsüngremji Tsüngrem aser meimchir. Pa kotak nung lir, aser asenok alima nung alir, aser kenü Pa den asenok kotak nung alitsü. Asenok ali takümüji ken atema dang lir.

Tsüngrem tsübuttsü tepuokdak alir obendanger tsübuttsü ama masü. Ibai kilir ka kibur tsüngdang atentena noktakba ama masü. Ibai tanuri Tsüngrem uluba aser Pa sentsüwangshi angateta akümba. Asenoki Pa tsübur kechiaser pa kanga tulu. "Yihuda nung Tsüngrem metetta lir: Israel nung Pa tenüng tulu" (t.1). Oh, Pa tenüng koda tulu! Alima nung meimchiri Pa tenüng tulu amajok nung tetshir. Koda tejashitsü! Asenoki Pa tsübur kechiaser Pa sentsüwangshi lir. "Tenemti dang nungia na sentsüwangshiba aser tamaren" (t.4).

Pa shiba aser Pai inyakba asoshia asenoki pa tsübur. "O Yakob Tsüngrem, nai arütsüba ajanga talungtsü o kor na süchia ogo" (t.6). Tsüngrem tsübuttsü nungi kechi adoker? Tsüngremi asenok tongpang rarar. Pa tsübur jakdang pa aor. Asenoki Pa jakdang noktaktetsü kechiaser

Yisui asenok asoshi mepishitsür. Asen temenen asoshi Tsüngremi mejashitsü. Yisui asenok asoshi anebalur. Asenoki Tsüngrem tsübuttsü, aser Pai asenok asoshi raratsü.

Nai Tsüngrem tsübuttsübaji dalang. Aser nai Pa tsübuttsübaji na kuli aika lir. Nai Tsüngrem nem tim akhüm tsübu agütsür asü? Pa shiba aser Pai na atema kechi inyak mapang agia shisadangang. Pa alidaki arung aser Pa külemang. "Kibuba tsübuttsü shisatsü tetenzük lir" A.Shin 9:1).

## Myanmar nung Khristantem tekülem sentong agiba nokdang

**March 03, 2023:** Myanmar Khristan lenirtemi sepai kübok Chin state nung sepaitemi Khristantem Amongnü tekülem sentong agiba densema yimsü dak sendakba maparen balala nokdang.

Tawa yanglushiba martial law kübok sepai commander temi Khristan nütüng aika aliba Chin State kübok jila 9 nungi jila 7 nungbo nikongdang 6:00 ako nungi anepdang 6:00 ako tashi curfew ozüng benoker aser nisung 5 dak tali adenshiba nokdang.

Chin state nung item ozüng tasen ajanga Khristantem timtemer, kechiyong Amongnü tekülem sentong agitsü atema- a anogo tenet jelia sepaitem dang nungi temelaba meshitsüsa akümer, ta Arogo kati metetdaksü.

Osangbener den jembidang Arogo lenir kati, "Item ozüng sentong agiba densema Arogo dak sendakba maparen ajak nokdang. Iba tensa ya kanga majung," ta metetdaksü.

Chin state yimtiba, Hakha nung denomination balala nungi

Khristan lenirtemi sepai ketdangsertem ajurua jembiba sülen nungi Amongnü tekülem sentong agitsübo melaogo.

Ajisüaka ketdangsertemi Arogotem dang Tenla kidangi aoer putirtem aser Khristantem tenüng den phone number agüjang, ta tuyur.

Chin state kübok Mindat jila nung aliba Arogo ka nung pastor-i, "Onok dang Tenla kidangi aoertem tenüng agüjang aser asüpila sentong agiba densema lokti sentong agiba ajak metetdakjang ta tuyuogo," ta metetdaksü.

February 2, 2023 nü sepaitemi Sagaing, Magway, Bago, Tanitharyi, Kayah, Karen aser Mon states kübok jila 37 nü martial law sangdongba sülen ano ita 6 emergency sangdongogo.

Iba sülen February 22 nü sepaitemi Sagaing region kübok jila asem nung martial law sangdongogo.

Tang nütüng million 54 aliba Myanmar linük nung Khristan nütüngbo shilem 6 shi dang lir.

**AO OSHI ANGAZÜKDAK:  
TANÜ ANGAZÜKTSÜBA OJANG**



**Pakti**

- (n) tsük aputsü atema yong agi atakba oset (large mat)
- \* Pakti nung tsük pur jang küma asener.

**Pakzü**

- (v) nisung telok telok senzüba (crowding around)
- \* Lanurtem mapa mangu pakzüa senzür.

**OLONG PAITEP # 6444**

1		2				3			4
								5	
6									
					7				
		8							
									9
	10			11					12
	13								
						14			
15									
			16						

**TIPIEN**

- 2. Kümli tajung / Tejembinü - (6)
- 5. Te \_ \_ \_ en - (3)
- 6. Aou tapu ka - (5)
- 7. Injang agi asü - (5)
- 8. Temola tejaklen - (5)
- 11. Langtem - (5)
- 13. Süngdong tatembang - (5)
- 14. Tebang nungi tangu odaktsü - (5)
- 15. T \_ \_ \_ msa - (3)
- 16. Am agi yangluba - (6)

**LANGTSÜNGLEN**

- 1. Nüji masü - (5)
- 2. Anüngdang - (6)
- 3. A \_ \_ \_ \_ \_ g - (5)
- 4. Aika - (5)
- 7. Tezülen - (5)
- 9. O bendangdak - (6)
- 10. Menütsü / Lutsü - (5)
- 11. Teka amtep - (5)
- 12. Tango asüket - (5)

**OLONG PAITEP # 6443 TELANGZÜBA**


**TIPIEN:**

- 1. Telok, 4. Aluru, 6. Ozüng,
- 8. Emk, 9. Kin, 10. Teti, 12. Süir,
- 13. Jen, 14. Ola, 16. Talak, 17. Mazük.

**LANGTSÜNGLEN:**


- 1. Tenükjang, 2. Luden, 3. Kioaktsü,
- 5. Lenti, 7. Tajangzük, 11. teronem,
- 12. Sempa, 13. Jahaz.

**NAI-A YA METETTER MA**



Tsüngsem mesütsü ya yimya balala aika lir. Itemji kar yangi noksa nung angur. Naia koba yimya agi ne tsüngsem mesür?

**Noksa nung meputepi aliba 5 bushiang**



**Assam nung ketdangsür 3 süpokrem meshidang apu**



**Guwahati, March 3, 2023**

**(Agencies):** Directorate of Vigilance and Anti-Corruption, Assam Police-i tatalokba balala nung ketdangsür aseme süpokrem meshia agidang apu.

Bodbarnü parnoki Registrar of Cooperative Societies ketdangsür ka apu.

Guwahati kübok Khanapara nung parnoki Senior Assistant ka apu aser pa ya Bidyadhar Das ta jangjaogo. Das-i süpokrem meshia agidang apu ta osang angazüker.

Directorate of Vigilance and Anti-Corruption tsüngdang ken

o benoker kati ashiba sülen ketdangsürtemi Das mita liasü aser ken o benoksangi pa indang pension file atema Das nem süpokrem agütsüdang pa apu.

V&AC tsüngdang Das anema ken o benoksangi kulisertem lia Das aitsü.

Ano, V&AC telokisa tanga tatalokba ka nung ketdangsür kati süpokrem meshia agidang apu.

Goalpara kübok Matia Block nung Block Elementary Education Officer Bajlul Basit Sarkar-i süpokrem meshidang

apu. Sarkar-i bank loan ka nung sign asütsü atema süpokrem meshi aser iba nisung yagi V&AC tsüngdang ken o benoka liasü.

Maneni, Nagaon district kübok Koliabar revenue circle nunga lat mandal kati süpokrem meshidang apu.

Iba nisung yagi ali ayoktsü temelaba agütsütsü atema nisung ka dang süpokrem meshia liasü, ta Directorate of Vigilance and Anti-Corruption, Additional DGP, Vigilance, Surendra Kumar-i ashi.

**Regional party temi takok angu saka BJP-i tenüng agir: AJP**

**Guwahati, March 3, 2023**

**(Agencies):** Meghalaya, Nagaland aser Tripura Assembly elections nung regional party temi takok angu saka BJP-i iba tenüng agir ta Assam nung regional party tasen Asom Jatiya Parishad (AJP)-i metetdaksüogo.

BJP-i olulu prokshir. Tripura, Meghalaya aser Nagaland nung

BJP-i sorkar tasentem akümtsü ta ashibaji shitak masü, ta AJP-i ashi.

"Nagaland nung BJP-i assembly menden 20 nung toktep saka 12 nung dang takok angu. Ajisüaka, Nagaland nung regional political party NDPP-i menden 25 nung takok anguba ajanga BJP-NDPP teloktep atema menden peria angu.

Anungji BJP masü saka NDPP ajanga Nagaland nung sorkar akümtsü jenjang ngutet" ta AJP-i metetdaksü.

"Meghalaya nung election magidang BJP-i Conrad Sangma'er ochimashi ta tai tongloktsü aser parnok kija dang toktep, saka BJP-i menden 2 nung dang takok angu" ta AJP-isa ashi.

**Meghalaya nung election sülen lendong aika atalok; 1 asü**

**Shillong, March 3, 2023**

**(Agencies):** Meghalaya kübok assembly constituency asem nung election tembanga sülen mepetmesü adoka raratepdang nisung aika yiru aser külen nisung ka taitsü keta sür aliba angu.

Eastern West Khasi Hills kübok Mariang constituency, East Khasi Hills kübok Shella aser West Jaintia Hills kübok Mokaiaiw nung lendong atalok aser iba atema section 144 CrPC agütsüogo ta ketdangsürtemi ashi.

Mairang nung deputy commissioner indang office kima nung anendena aliba gari aika mi agi rongdoktsü, ta district ketdangsür kati ashi.

"Lendong atalokba tesem nung nisung ka taitsü keta sür lia angu" ta paisa ashi.

Mairang assembly constituency results nung temulung masüba agi Congress pusemertemi DC office nungbangdang lendongji atalok.

Iba constituency nung Meghalaya Assembly Speaker aser UDP tanishir Metbah Lyngdoh-i votes tera agi dang Congress candidate Batskhem

Ryntathiang madak takok angu. Lyngdoh-i votes 19,066 aser Ryntathiang-i votes 18,911 angu.

Lungkak aiterterem senshidaktsütsü atema district police-i tear gas shells khaloktsü, ta ketdangsürisa ashi.

Ano, Sohra nunga Shella assembly constituency results nung temulung masüba agi NPP pusemertemi SDO indang office nung lung agi aon.

"Tensa aziüoka lir aser sepa talila mapa lezmüksüogo" ta Sohra district SP M G R Kumar-i ashi.

Shella assembly nungi United Democratic Party candidate Balajied Kupar Synrem-i votes 434 agi National People's Party candidate Grace Mary Kharpuri madak takok angu.

Maneni, West Jaintia Hills district administration-i Sahnsiang yimtsüng nung curfew ozüng agütsüogo.

Brihostibarnü assembly election results adokba sülen Sahnsiang yimtsüng nung telok ana tsüngda raratep.

NPP national president aser Chief Minister Conrad K

Sangma-i nisung ajak dang tensa meraksai yimjung nung alitsü mepishigo aser paisa political party tanishirtemi dang pei pei pusemertem majungmesotsü atema ayongzükogo.

Meghalaya assembly election 2023 nung NPP-i single-largest party ngutet. February 27 nü constituency 59 atema polling asüdang NPP-i menden 26 nung takok angu.

NPP den yariteper UDP-i constituency 11 nung takok nguua second-largest party nguogo. 2018 election nung UDP-i menden 6 nung dang takok angu.

Congress aser Mamata Banerjee-i aniba TMC-i menden pungugu (5) aser BJP-i menden 2 nung takok angu.

Meghalaya nung tawa tasen tentetba Voice of the People Party (VPP)-i menden 4 aser Hill State People's Democratic Party (HSPDP) o People's Democratic Front ajanga menden anana (2) nung takok angu.

Taküm assembly election nung Independent candidate-i takok nguogo.

# Ukraine rara atema Russia tenüng asentsü mali: Lavrov



masüngdang?" ta Lavrov-i Observer Research Foundation indang chairman Sunjoy Joshi dang ashi, shiba jembishinü nung onir liasü.

German Chancellor Olaf Scholz, NATO tekolakba Jens Stoltenberg aser US Tir Joe Biden nungeri Russia nükjindong nung tamakok ajuruba aser rara nung tamakok ajuruba parnok den ali ama bilemer, ta Lavrov-i tuteta ashi.

Russia nunger inyaksangshi ya Iraq nung America nunger inyakyim den medemdangtsü makok, ta pai ashi.

"Onoki küm ter tekumdangtsü shia aru aser parnok (Ukraine) dang parnoki kanga mejungi inyaker ta shiogo. Aser ibai tzüym alema masü saka küm noklang aika Russia nunger lia aruba arütsü nung lir," ta pai ashi.

Donbas nung injang-bomb khaloktsüba ya 2022 küm tetenzüklen tali akum, anungji Russia nungertem Ukraine anüdok tsütsü alirtem dak tenük yokba sayur, ta Lavrov-isa ashi.

Pai 2014 Euromaidan protest athishia jembi, koba ajanga taoba tir Viktor Yanukovich atsüngdok aser "Mitkar tashi amshia sorkar atsüngdokba sülen pari temzüng yangluba nung Russia nunger (Ukraine

nung alirtem) nem shisaliok, media aser sobaliba nung Russian oshi amshitsü temeden magütsü. Russia oshi aliba ajak parnoki agientsü," ta Lavrov-isa. Mitkar tashi amshia sorkar atsüngdokba sülen yimten yimsüsüba tashi amshirtem ya "neo-Nazis" lir, ta pai ashi.

Mitkar tashi amshia sorkar atsüngdokba magizüker dang Ukraine sorkari kiralongrar ta aja.

"Iba yimli yagi item nüburttem anema rara tenzüker. Onoki parnok kumzüker," ta Lavrov-isa ashi.

Takhangba agüjaka Ukraine anüdoklen tesem tilaka nem special status magütsü aser arütsülen Russian oshi jembia alirtem medendaktsüi temzüng aika yanglu, ta Lavrov-isa ashi.

"Ukraine nung Russian oshi agiandang shingai ola madok. Onoki OSCE aser tembar European dangi ao aser parnok dang kechiba kecha mashir ta asüngdang."

Ireland nung English sayuba anendaktsü mesüra Belgium nung French oshi nokdang mesüra Switzerland nung German oshi mamshidaktsü nung kechi asütsü, ta Lavrov-isa athishia ashi.

International forum katia item ken o mejembi, ta pai ashi.

**New Delhi, Metsüremi/March 03 (Agencies):** Alima nung rongsenketzüng tsütsü timtem ajurua aliba atema Russian Foreign Minister Sergey Lavrov-i US aser par allies tem tenüng asen aser Ukraine nung rara atema Russia tenüng masentsüla, ta New Delhi nung 2023 Raisina Dialogues alidang ashi.

Lavrov-isa ashiba agi, taoba küm Indonesia nung G20 summit alidang G20 Bali Leaders' Declaration nung Ukraine rara aija shia lir saka kechiba G20 ajanga taoba mapang senden amendang Iraq, Libya aser Afghanistan nung rara anema mesangdong.

"Mile meyirijang aika bilar aliba Yugoslavia, Iraq, Syria nung rara adokba ya par linük tejangraba tsütsü timtem ka lir ta US-i sangdongtsü temeden lira, kechiba parnok dang kecha

# Belarus nunger Nobel prize angur Bialiatski küm ter tepuokdak ayutsü

**Minsk, Metsüremi/March 03 (Agencies):** Belarus nung human rights advocate aser 2022 Nobel Peace Prize angur Ales Bialiatski küm ter tepuokdak ayutsü court kati obendang agütsüogo.

Bialiatski aser ano pai tentetba Viasna Human Rights Centre nungi lenir aseme longkak aitba nung senotsü teyari agütsü aser senotsü shibelenba nung aija liasü.

Bendang lima nung jenoka alisang Belarus nunger opposition lenir Sviatlana Tsikhanouskaya-i ashiba agi, Bialiatski aser danga activist tem ken o ka nung aitsüba ya tim masü aser tesüngmangtsüka lir.

"Iba ama taktsü mapa anema raratsü asoshi asenoki akokba mapa inyaktüsü aser parnok chioktsüla," ta lai Twitter nung ashi.

Prosecutor temi Minsk court dang Bialiatski nem temerenshi küm 12 tepuokdak ayutsü ashi. Pai item aibelen mapa meinyak ta ashir.

Belarus sorkar meyong news agency Belta-ia iba obendang jangjatsüogo aser Bialiatski tepuokdak küm ter ayutsüba indanga shia liasü.

Mapang talangka nungi tanishir inyaka arusang Alexander Lukashenko ya 2020 tir election nung takoker ta sangdonger 2021 nunga maneni inyakba sülen sorkar

anema longkak aiter pua temerenshi balala agüja Belarus nunger tejangia nisung noklang aika tepuokdak ayuba rongnung arishi küm 60 tain Bialiatski ya ka lir.

Bialiatski aser pa den külem tenzükerkem ya 2021 nung apu aser parnok anema ken o benokba ya Viasna ajanga political prisoner nem sen agütsüba aser parnok ken o jembiba taa agütsüba nung yariba nunga sendaktepa lir.

"Külem tenzüker dak tai tongloksüba ya parnoki human rights mapa inyakba den sendaktepa lir, Viasna human rights centre-i yimtenren tsütsü nungi merenshirtem yariba," ta Viasna-isa ashi.

Bialiatski aser co-defendants Valentin Stefanovich aser Vladimir Labkovich nunger anema ken o benokba aser obendang agütsüba ya German Foreign Minister Annalena Baerbock-i aitsü aser Belarus nüburt indang temeden, yimya tajung aser talenba nungi salatsü asoshi küm aika rara aruba nung ajemdaker obendang ya agütsü, ta ashi.

Bialiatski-i human rights aser democracy atema mapa inyakba asoshi Russian rights group Memorial aser Ukraine indang Center for Civil Liberties den külemi taoba küm October ita Nobel Peace Prize agüja liasü.

## Menungra Bilemteter

Asür. Yimnakumla, 4<sup>th</sup> March 2022 - 4<sup>th</sup> March 2023

Temeim oja, na tanü anogo nikonngdang süngjema amozüka aoba anogo nungi tanü küm ka ajungba anogo tashi Tsüngremer taochi agi onok len ania aruogo. Ne tesüngjem, taremszüker aser shisatsü tajung onoki kanga menungrar aser kodanga mamadoktsü. Ne temeim onok nükla dangi arur aser iba anogo onoki sarasadema amonger. Tsüngremer ne tanela anisüngzükdak lidakjangma.

**Temeim Kinungbo, chirnur aser kinungertem**



## MULUNGNEN O

Onoki teti meima aliba asür **Meputemjen** (Longmisa), ajungbena akümüli wadang tembangba mapang nungi shirnokisa nübu, rongsen, shisatsü aser sarasadem agi yariogo, nenok ajak dang kanga pelaba lemsateper. Onoki kija kibongshia dangi tsüngdong arua onok pelaba melemsatepteter, saka Tulusang Tsüngremer nenok ajak moajangma.

**Temeim kinungtsü, chirnur aser kinunger adianu**



## MULUNGNEN O

**ASO :**  
15th March 1948



**ASÜ :**  
23rd Feb. 2023

**Asür Chubainla** Mopungchuket (W/o. Lt. Obangsungit), ajungbena alima nungi pila orr, ozü kinungertem mangyim tia nung alidang kija, kibong aser lokti balala, shirnokisa sarasadem den ali rongsen, shisatsü aser nübu agi yaritepogo, nenok ajak dang kanga pelaba lemsateper. Tsüngremer nenok mapa tajung asoshi maneni moajangma.

**- Temeim Jala, Jabaso, Semchir aser Kinungertem.**



**Nationalist Democratic Progressive Party (NDPP)**  
Mokokchung Region

## PELABA SANGDONGER

14th Nagaland Legislative Assembly General Elections 27th Feb. 2023 anogo nung nüburttem-i NDPP dak alima yanglutsü aser yimchi yimjung bener arua Naga lima yimsü asütsü asoshi temulung lemtetta takok tulu bener arutsüba asoshi kanga pelaba lemsateper.

2018 taoba 13th NLA Election nung party tasen süaka asenok Mokokchung nüburttemi temulung lemtetta nüburt lenitsü MLA 2 (ana) atokdaktsü, tia kaa NDPP BJP lokteper küm pongu tashi kecha metokmeperi meli tembangdaktsüba asoshi kanga pelaba lemsateper.

Maneni, tang 14th NLA General Election 27th. February, 2023 koba nung NDPP party ajanga asen Mokokchung kübok Constituency 7(Tenet) nung tokteptsü maangka angu. Yamaji, taoba mapangtem tang nungi tan Election nung NDPP Candidate tem dak asen

Mokokchung nüburttemi meima sakloka parnok 6(Trok) tashi atokdaktsüba aser NDPP meimba den tamang teimla tulu agi shirnokisa takok tulu bener arutsüogo nenok ajak tang kanga pelaba iba sangtong ajanga lemsateper.

Tang nungi tenzüka, 14th buba Sorkar nüburttem tenzüka aodang tamang teimla nung nüburt aser alima asoshi inyaktetsü ajak dang NDPP Mokokchung region-i nungita yariteptsü ayongzüker.

**Sd/-**  
**N. Bendang Jamir**  
President  
NDPP Mkg. Region

**Sd/-**  
**Repameren**  
General Secretary  
NDPP Mkg region

## Menungra Bilemteter



**09/10/1960 - 21/02/2023**

Onoki teti meima aliba Obala asür **Nokenkaba** (Waromung) akümüli wadang tembanger iba lima toktsür aoba mapang shirnokisa pei akokba yari nübu, rongsen, shisatsü aser sarasadem agi yariogo, nenok ajak dang kangasa pelaba lemsateper, nenok mapa tajung temeim asoshi onoki Tsüngremer tenüng asanger. Tulusang Tsüngremer nenok ajak talupusa moajangma ta ozü sarasadem.

**Temeim Kinungtsü, Jabaso aser Kinungertem.**

## Australia-i 3buba test koka WTC final atema qualify süogo



Holkar Cricket stadium, Indore nung India aser Australia na tsungda tasembuba test asaya tembangba sülen tangokba noksa nung angur. Iba asaya Australia-i wicket 9 agi kokogo.

**New Delhi, Metsüremi/ March 3 (Agencies):** India aser Australia na tsungda Holkar Stadium, Indore nung tasembuba test asaya Australia-i wicket 9 agi kokogo. Hokolbarnü asaya akoktsü atema Australia-i run 76 dang nungdaka liasü aser parnoki asaya ayong ayonga akok.

Anogo asemububa nung asaya akokba sülen Australia team World Test Championship final atema qualify süogo. Border-Gavaskar Trophy nung India 2-1 agi tejakdang lir aser tatabangbuba test Ahmedabad nung asayatsü. WTC final nung asayatsü atema India team-i iba asaya akoktsü nungdaker.

Hokolbarnü Ravichandran Ashwin-i mezüngbuba over ona tenük aser pai tanabuba ball nung Usman Khawaja out süja liasü.

Ajisüaka Travis Head (49\*) aser Marnus Labuschagne (28\*) nati aibelen mesüi asayatsü merang aser Australia team takok dangi ani.

Over 10buba sülen ball melenshiba sülen asaya ya Australia team-i aokbanger asayar.

Ball melenshiba sülena Ashwin mepelai liasü aser pa mepelaba ya pai ball aonba yimya nung sayu. Head-i over 11buba nung Ashwin-i ball aonba mapang four ka aser six ka züka liasü.

Taruba over nung Head-i maneni Jadeja ball aonba mapang bowler sang tekolak alema boundary ka azük aser iba ajanga Labuschagne-a tasü ita aküm aser over 12buba nung Australia team-i asayar ka out ser run 35 yanglu.

Iba sülen tenati tesülen meyipa merprangi maneni kanga junga asaya aser Labuschagne-i mid-wicket adena four ka azükba sülen asaya koka liasü.

Captain Rohit Sharma-i iba Test asaya metenzük tsungda, iba asayamung nung Australia dak atalokba ama onok daka ataloktsü akok ta ashiba

asangsang nung ataloka liasü.

Tasembuba test asaya nung Nathan Lyon-i kanga junga asayaogo aser India nung tanabuba innings nung pai run 64 agütsür wicket 8 agia liasü.

Iba asaya ya mezüngbuba anogo nungi Australia meyong liasü, kechiyong parnoki India team nem run 109 dang yangludaktsür asayar ajak out sütsü. India nung asayaba mapang bendangertemi takok angutsü kanga tasak aser Australia team-ia küm trok sülen tang mezüngbuba India nung asaya ka kokogo.

India team-bo küm 10 tsungda India nung asayaba mapang tang agi tasembenbuba dang tamakok nguogo, ajisüaka Ahmedabad nung March 9 nü nungi tenzüka asayatsü aliba asaya metenzük tsungda sentong yanglushitsüsa akümtsü.

Tasembuba test asaya nung India team-i innings ana nung run 109 aser 163 dang yangluteta liasü.

## India hockey team coach asütsü Craig Fulton shimogo

**Metsüremi/March 3, 2023 (Agencies):** Hockey India-i Hokolbarnü sangdong ka ajanga India tebur hockey team coach asütsü atema South Africa nung Craig Fulton shimba sangdongogo. Pai Graham Reid melentsü, shibai January ita World Cup tembangba sülen mapa tokja liasü.

Team 16 asayaba World Cup nung India team jenjang 9buba nung tembang aser iba sülen Australia nung Chief Coach Reid-i mapa toktsü aser pa den analytical coach Greg Clark aser scientific advisor Mitchell Pemberton natia mapa tokja liasü.

Fulton, shiba küm 25 shi coach mapa inyaka arudar, pai Indian hockey temaba jenjangi anir atutsü atema meranga inyaktsü tenangzükba agütsüogo.

"Indian men's hockey team chief coach asütsü shimba ya tetushi tulu lir. India nung iba asaya kanga junga yangloka lir

aser tang India team tejakdangi anir atutsü yongya atar kong sempet aketba asayar tajung aika lir," ta pai ashi.

Fulton-i taoba mapang tesem balala nung coach inyakba mapang takok tajung nguogo aser pa lenisüba nung Irish team 2016 küm Rio Olympics atema qualify süa liasü. Irish team Iba Olympics atema qualify asüba ya küm 100 nung mezüngbuba qualify asüba liasü. Iba takok tajung anguba sülen pa nem 2015 küm FIH Coach of the Year naroküm agütsü.

Kasa mapang nung Fulton ya reigning Olympic champions Belgium indang assistant coach liasü. 2018 küm Bhubaneswar nung World Cup akokba mapang pa Belgian coaching staff nung densema liasü.

Fulton nem taküm Belgium Coach of the Year naroküm agütsüogo.

Asaya aliba mapang küm 10 tsungda Fulton-i South Africa

team nungi 195 ben asayaogo. Pa 1996 Atlanta Olympics aser 2004 Athens Olympics nung South Africa team nung züngoksema liasü. Pa World Cup aser Commonwealth Games nunga asayaogo.

Fulton ya taruba ita Australia aser Germany na den Rourkela nung FIH Pro League tasayadak nung team nung adentsü imlar.

Iba asayamung nung India team mezüngbuba Germany den March 10 nü asayatsü aser iba sülen tanabuba asaya March 13 nü asayatsü. India team ano Australia den March 12 aser 15 nü asayatsü.

Iba hopta tetenzüklen Hockey India-i, Australia aser world champions Germany den taruba Pro League asayatem atema interim coach mapa bena atatsü asoshi Australia nung David John, BJ Kariappa aser Shivendra Singh nung shima liasü.

## Ronaldinho'er jabaso Mendes

### Barcelona Academy nung denogo

**Metsüremi/March 3, 2023 (Agencies):** FC Barcelona-i sangdong ka ajanga Brazil nung forward Ronaldinho'er jabaso Joao Mendes den tenangzüktepba ka yangluba sangdongogo.

Arishi küm 18 tain asayar ya mezüngbuba Barcelona's B team nungi asayatsü imlar. Iba team ya Spanish football's third tier nung asayar ta club-i Brehostibarnü sangdong ka ajanga metetdaksü.

Taoba küm February ita Brazil club Cruzeiro toktsüba sülen Mendes ya club ka den danga sendaktepa maliasü aser trail mapang pa asayaba yimya agi Barcelona coach tem kanga temulung süa liasü, ya Xinhua sangdong ka ajanga metetdaksü.

Mendes ya Brac indang under-19 team nungi Manchester United den friendly asayaba mapang asayatokogo. Pai central striker ama

asayateter mesüra tanga position nunga asayateter.

Pa tachichi kayim asayar ka lir ajisüaka pai tabelen agia kanga junga asayateter aser tebu tsüngsü nung anidaka kanga junga asayatsü ta Barca timla lir.

Ronaldinho 2003 nungi 2008 küm tashi Barcelona nungi season pongu asayaogo aser 2004 nungi 2006 küm tsungda Barca-i La Liga titles aser Champions League trophy atonga akokba nung pai kanga tongtibang shilem agia liasü.

Pai Barca nungi 207 ben asayaogo aser iba mapang goal 94 idakja lir. Barca nungi asayaba mapang pa asoshi asaya tajungtibaji 2005 küm November ita Real Madrid goal 3-0 agi akokba asaya nung pai goal ana idaktsüba ya asütsü. Iba asaya nung pai kanga junga asayatetba ajanga Madrid pusemertemia pa nem tenüngsang agüja liasü.

## WPL: Delhi Capitals captain asütsü Meg Lanning shimogo



**New Delhi, Metsüremi/ March 3 (Agencies):** Delhi Capitals puri mezüngbuba Women's Premier League (WPL) atema team captain asütsü atema Honibarnü Australia captain Meg Lanning shimogo.

T20 World Cup ponguben tashi koker aliba asayar Lanning nem India tsür Jemimah Rodrigues-i la indang deputy ama teyari agütsütsü.

Lanning lenisüba nung Australia team-i taoba ita Twenty20 World Cup kokogo.

Arishi küm 30 tain asayar, shiba Delhi team-i auction nung sen crore 1.1 agi alizükogo, la Australia captain ama T20 international asaya 132 nungi 100 nung asayaogo, koba tetsürtem rongnung T20 asaya nung timtiba asütsü.

La ya tetsür asayatem rongnung tajungtiba ka lir aser lai T20 asaya nung run 3000 dak tema yanglua lir, kong century

ana aser half century 15 densema lir. Laisa, ODI asaya nung century 15 aser half century 21 yanglua lir.

"Delhi nung densema team len anitsü maongka anguba ya ni atema nümadangtsü mapang ka lir," ta Lanning-i ashi.

Delhi Capitals pur mezüngbuba asaya Deobarnü Royal Challengers Bangalore den asayatsü.

WPL nung Australia tsürtem rongnung captain tem rongnung Beth Mooney (Gujarat Giants) aser Alyssa Healy (UP Warriorz) densema lir. India team captain Harmanpreet Kaur lenisüba nung Mumbai Indians asayatsü aser Smriti Mandhana lenisüba nung Royal Challengers Bangalore asayatsü.

WPL team pongu nungi asembo Indian Premier League clubt tem meyong lir. Iba asayamung ya March 4 nungi 26 tashi Mumbai nung tesem ana nung asayatsü.

## BILEMDANGANG

"Minykdangra takok tamakok mejangjatsü."